




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## O Hosea ma lana Āvā Talitane

**Salamo 78:34-39:**

“Na latou sailiili atu ia te ia ina o fasiotia i latou e ia; ona latou

fo’i ai lea i le sailiili i latou i le Atua. Ona latou manatu ifo ai lea o le Atua o lo latou papa ia;

o le Atua silisili o ia na te faaolaina i latou. A ua latou  
*faaauau itulau e 13*

### O le Tusitala o le Evagelia a Luka

*saunia e*

**Sepi Gafa**

Pepa mai le Mafutaga a le Matagaluega a Apia Sasa’e  
17 Iulai 2014  
*faaauau itulau e 2*

### O Lou Lima

“Teacher, it’s your hand!”

O le manatu o le faatonu o le nusipepa (editorial) na tusia i le pepa o le Aso o le Faafetai (Thanksgiving Day), o loo  
*faaauau itulau e 13*

*O le Mafuaaga o le Pese:*

### Rescue the Perishing

*silasila i*

**Itulau mo Tupulaga Talavou**

*faaauau itulau e 10*



O se vaaiga lea i le maota o le Ioane Viliamu, poo le Fogafaleono i Apia, lea e iai le Ofisa Tutotonu o le Ekalesia. Ua manaia lava le tuu mai o le fale i le vaai atu lea i ona vaega ua mae’a ona faafou. A o loo iai pea fatamanu i nisi o vaega o le fale e le’i uma ona fai. E le taumateina lava le manaia o le fale pe a oo ina mae’a le galuega o le toe faafou.

### O Tusi Mai ia Musi

“Ma’imau pe ana iai nisi e tusi mai ia a’u!” E tau le lagona le  
*faaauau itulau e 13*

### Se ‘Aua !

Na ou ulufafo ma lo matou fale ma lo’u ita tele, lia’i le faitoto’a ma tapuni. Na tafe ifo o’u loimata i  
*faaauau itulau e 11*

---

# O le Tusitala o le Evagelia a Luka

*mai le itulau muamua*

## 1. O le Tusitala o le Evagelia a Luka

O le tusitala na tusia le tusi a Luka, na ia tusia foi le tusi o Galuega. O Luka o le tagata o nuu ese, e manatu le toatele o le tagata Eleni. Oloo ta'ua faatolu e Paulo le igoa o Luka i lana tusi i le Ekalesia i Kolose (Kolose 4:14) "Luka le foma'i pele", o Luka o le foma'i alofaina. E faapea foi i le tusi o Filemoni (Filemoni 2:4) oloo ta'ua ai e Paulo, o Luka o lana uo i le galuega (fellow worker), ma le tusi (2 Timoteo 4:11), e na o Luka na faatasi ma ia i lona faa-falepuipuiina lona lua i Roma.

Oloo ta'ua e Paulo i le tusi o Kolose (Kolose 4:10-14) "Na o i latou ia o le 'au peritomeina na latou galulue faatasi ma a'u i le malo o le Atua, na fai foi i latou ma faamatala loto mai ia te au....."

Sa aumau ma nofo Luka i Anetioka i Suria, ma sa faia ai le fono a le Ekalesia i Anetioka, sa auai atu iai Paulo ma Panapa. Sa faailoa ai e le perofeta o Akapo, (Agabus), o le a oo mai le oge tele (Gal 11:28) O 'i oloo manatu le toatele o tagata suesue i le Feagaiga Fou, sa nofo ai Luka ma avea ai o ia ma Kerisiano i le tau faaiuga o le AD 30, ma avea ai ma tagata o le Ekalesia i Anetioka. O Luka o le foma'i (physician) - (Kol 4:14). O Anetioka foi sa iai le a'oga ta'uta'ua i mataupu faa-foma'i (medical school). O lona uiga sa aoga ma aoaoina Luka i lenei tomai i Anetioka a o nofo ma aumau ai.

O le Evagelia a Luka ma le tusi o Galuega oloo tusi aga'i ia Teofilo (Theophilus). E iai vaega i le tusi o Galuega oloo ta'ua ai e le tusitala "o i matou", oloo faailoa ai o le tusitala e iai ona sootaga vava lalata ma le aposetolo o Paulo.

I le Galuega 6:5 oloo ta'ua ai e Luka uluai tiakono na filifilia e toa fitu aofia ai ma Nikolao o le Anetioka. O lona uiga e tele le silafia e Luka o lenei tagata mai le aulotu ma le Ekalesia i Anetioka sa lotu ma galue ai.

E ma'eu foi le alofa o le Alii i lona faaaogaina o lenei auuuna i ona agavaa ma ona tomai i lana galuega tala'i, ua ta'uaogaina ai le soifua o ona tagata ua faaolaina. O le 25% o tusi o le Feagaiga Fou sa tusia e Luka.

## 2. O le Faamoemoe ma le Mafuaaga o le Tusi a Luka

E pei ona ta'ua i luga, o Teofilo le suafa o le tagata oloo tusi aga'i iai, peitai e le o maua ni faamaumauga e uiga i lenei tagata. E iai masaloga o le tagata o nuu ese sa avea ma Kerisiano, aua oloo ta'ua e Luka o Teofilo ua a'oa'oina lelei i le Tala Lelei a Iesu Keriso. (Luka 1:4). Oloo ta'ua e Luka i lana tusi lenei, le Alii e, Teofilo (most excellent Theophilus or Your Excellency). O le faaea lea e ave i se tagata taualoa, tamaoiga o se tagata maualuga lona tulaga i le malo o Roma. E iai le manatu o nisi, o Teofilo o se Kerisiano sa mafuta faatasi ma Luka i le Ekalesia i Anetioka, o lona uiga, o mea uma ua tusia e Luka e uiga ia Iesu Keriso, e saga faamautuina ai lona aoaoina i le avea ai ma Kerisiano, ina ia ona iloa ma talia, o Iesu o le Faaola o tagata

uma, ua ia afio mai e saili ma faaola e o leiloa. E iai foi le taofi o nisi o le au suesue o le Feagaiga Fou, ua talia e Teofilo lenei tusi ma lona tau (cost) e faalauiloa ma faasalalau ai. Oloo iai foi le manatu o nisi, o Teofilo, o se igoa e faasino i se faalapotopotoga o ni tagata faatuatua.

## 3. O Ala Eeseese sa Faaaogaina e Luka e Fesoasoani ai i le Tusiaina o le Tusi

E le'i vaai tino Luka ma faalogo i aoaoga, vavega ma fetalaiiga a Iesu. E pei ona ia ta'ua i le faatomuaga o le tusi (Luka 1:1-4) "E toatele ua taumafai ona tusi faasolo le tala i mea ua uma ona faia i o latou luma, e faapei ona tuuina mai ia te i tatou e i latou ua matamata iai, o e foi ua fai ma auuuna a le Upu talu le amataga, o le mea lea ua ou manatu ai, ua ou matua sue i mea uma lava talu le amataga, ou te tusi faasolo atu ia te oe le alii e, Teofilo, ina ia e silafia le tonu o tala ua aoaoina ai oe." O mea uma sa ia faalogo, faitau ma maua mai ia te i latou sa talaiina ma folafola le Tala Lelei, lea ua ia tuu faatasia i le tulaga e pei ona iai, mo Teofilo e pei ona tusi iai.

E tele le sao o Paulo i le tusi a Luka ma le tusi a Galuega. O le na suia e le Keriso Toetu, sa ta'ita'i ma faatonu ia Paulo i mea uma e ao ona fai. O aoaoga, lauga ma galuega sa vaai ma molimauina e Luka, o isi ia o 'oa ma tamaoiga taua sa ia faamaumauina ma faamatalaina.

E iai foi tamaoiga o le Tala

*faaauau itulau e 7*

---

# O LE LAUGA

FT: Esoto 15: 1-11.

FF. Roma 12: 1-12

**Matua:** Esoto 15: 2:

“O le Alii o lo’u malosi ia, ma la’u pese, ua fai foi o ia mo’u olataga, o lo’u Atua lenei, ou te faaneenee iai, o le Atua o lo’u tama, ou te vivii lava ia te ia.”

**Manatu Autu:** O le Atua, e viia faasoloatoa ma faalausosoo.

Vivii atu ia outou i le Alii, aua e lelei o ia, aua e faavavau lava lona alofa. Vivii atu ia i le Atua o atua, aua e faavavau lava lona alofa.

E muamua ona momoli laau i Fogaa ma ave le sa ia Manuvao, o le viiga lea ma le faafetai i le Atua le Tama, le Alo ma le Agaga Sa. O le Atua o Samoa. O lona viiga e tataua ona faasoloatoa ma faalausosoo, aisea? Aua o ia sa faama’ite ma faatupu i loto, le o ese mai i Aikupito, le nofoaga o le oi ma le malaia. O lona finagalo alofa, ia faataunuu le malaga i Kanana, le nuu o le folafolaga.

O moomooga o le Tui Fiti, sa fia faamalulu i le vaisa o le Tuimanu’a. O moomooga o le tupu o Tavita a o lafi i le ana i Atulama, o le fia inu i se vai mai le vaieli o loo i le faitoto’a i Peteleema. O talosaga a Samoa, o le fia aulia o le tausaga fou lenei 2015. Ona manatua ai lea o le fesili a le Faaola: O ai se tagata e mafai i lona popole, ona faaopoopo se umi i lona ola? Aisea ua aulia mai ai le 2015? Ua faapefea ona tupu o lenei mea? O taumafa paleni ea? O le to’aga ea e tausi pe faagaioi ma faamalosi le tino? O le

faasaoloto ea o le mafaufau mai saisaitiaga o tiute ma faiva? O le ola faafiafia ea ma lava tapena mea e tua iai ua aulia ai le 2015?

O le tali a Isaraelu ina ua latou sopo’ia le Sami ‘Ula’ula o le 2014 ma tutu i le isi itu vai o le 2015, o le mana o le Atua.

O le Sami ‘Ula’ula, o le talafaasolopito o le Atua mamana ma lana pule malosi sa faasaoina le nuu faatauvaa. E a le folauga o fai nei? O le mana lava lea e tasi. O le Sami ‘Ula’ula o le fefe ma le atuatuvaale pe iu ina faapefea le malaga. O le malaga ona o le faama’ite a le Atua. Ina ave ia lou atalii e toatasi e osi ai le taulaga. O le Sami ‘Ula’ula o le Atua malosi nai lo le oti. Na taunuu i Kanana o le tama’i mamoe o lavelavea ona nifo i le laau, ae aua nei oo lou lima i le tama. O le isi ituvai lea ua laasia. O le ituvai fou o le laupepa fou o le tagata fou. Aua o lea ua manumalo le ola i le oti. Ua tafua ma vaeluaina le moana o le loto masalosalo ma le tuufesililili. Ua vaai mata i mea sa le vaai. Ua tuvae i elelee sa le savalia. Ua pa’i i tino le sau o le pisi sami. O le taeao fou ua totogo a’e. O le manogi ma le nanamu o le elelee sa ufiufi e le vai.

Ua faapefea ona faia o nei mea? Aisea lava ua sao ai i nuu lelei le aumalaga? O le aumalaga ea o ni agelu, ae le ni tagata? O le aumalaga ea e le agasala? Ai lava e amiotonu uma le nuu. Afai e maua i le aumalaga ni tagata lelei atoa se toatasi, e sao ai ea i Kanana?

Ua molimau le Esoto pe afai foi ae faitau mai i tua i le Kenese, ona saga faamaonia lea, o lenei aumalaga, e le o ni kerupi poo ni serafi. O le malaga a tagata agasala pei lava o Atamu ma Eva, Aperaamo ma Sara, Isaako ma Repeka, Iakopo ma Rasela ma isi pei o Samoa o le 2014. Ae aisea lava ua tuvae mai ai iinei i le elelee e le’i savalia, le ituvai sa lei sopo’ia?

E le o se aumalaga amiotonu, ae sei vagana lo latou Atua, le Atua e ona le malaga. Le Atua na faapogai i le malaga. Le Atua lenei e ona le mana. O lona mana ua tino mai i ala eseese o lona alofa e lava, ma lava pea. O le pogai lea ua le maua ai le malaga e Farao ma ona kariota!!!

Ua lele lava le se, ae lama le ti’otala. Ua lele foi le lulu ae valovalo’ia e ‘iao. E tulituli lava e Satani tagata. Ua oo lava ina ola faatasi o saito ma tita-nia. O le fatu saito foi sa faaagaga mo le elelee lelei, ae paga ua pa’u atu i le auala, ua solia i vae o asini. O isi i le mea papa, ua faalautagitagi. O nisi ua i vao tuitui, o le tagata lava ua fefaloa’i, ua fetosoa’ina, ua sasae atu le loto i o, ua sasae i o, ua masaesae. Ua nuti, ua malepe. Ua tulitautu mai e kariota ma solofanua a Farao o le pogisa. Ai lava a maua le malaga i mala. E le oge mala le malaga. Aua o puapuaga e tupu ai le mautinoa. O le mautinoa e tupu ai le faamoemoe. O le Atua, e lotolotoi, i le lalolagi fefiloi. E ui a fefiloi faatasi le  
*faaauau itulau e 4*

---

# O LE LAUGA

lelei ma le leaga i le aumalaga, a o le Ta'ita'i malaga o le Atua lea, e tumau lona mana, lona atoatoa e le liliu le Atua o le 2014 e le liliu foi i le 2015.

Ua talafeagai le valaau mai le Salamo 66: "Le lalolagi uma e, ia outou alalaga atu i le Atua." O le Salamo 113 foi ua valaau mai: "Vivii atu ia outou i le Alii. Ia outou vivii atu i le Alii. Vivii atu ia outou o auauna a le Alii. Vivii atu ia i le Suafa o le Alii. Ia faafetaia le Suafa o le Alii, e amata mai nei lava, a ia oo i le faavavau. Ia viiia le Suafa o le Alii e afua mai i le mea e alu a'e ai le la, e oo atu i le mea e goto ai."

Ua goto le la o le 2014 faatasi ma viiga o le Alii. Ua oso a'e le la o le 2015 faatasi ma viiga o le Alii. O ai ea na te vavao le viiga o le Alii aua afai e le alalaga tagata, o le a alalaga mai maa. Ae afai foi ae tuu maa, ae maa i aau, ona tata logo lea ma fagufagu i le pele o le Atua, e viia faasoloatoa ma faalausosoo. O le Atua, e viia faalausosoo ma faasoloatoa.

O tausaga o le tagata e 70 ia, ae afai e faaluaina pe faatoluina, o ai ea e fai sona loto? O le ala lea e lelei ai foi le talosaga ma le faaoioi a le aposetolo o nuu ese i le au malolosi, o ai ea nisi malosai nai lo Roma? O le malosai silisili i aso nei ma aso uma o lumanai i le solo lelei poo le faigata i le mativa poo le tamaoaiga i le ma'i poo le malolo. Avea loa nei, i lenei amataga fou, i le ituvai fou ma le laupepa fou, le tagata atoa aveva ma taulaga malie mo le

Atua.

Lou soifua ua faasaoina, ma lo'u ola ua lavea'iina, a o tulituliloa mai e Farao le sui o Satani ma sopo'ia ma laasia ma uia ai le maatui ma le maatala. A o lea lava na toe liutino tagata ai le Atua e saili mai se'i momoli mai le ola fou sa maliu ai i luga o le satauro, sa tanumia i le tuugamau, sa toe soifua mai i le aso tolu. Sa afio a'e i le lagi, ae auina ifo le Agaga Paia. O lea e faaoioi ma tatalo ai, le ola ua faasaoina ma faamagaloina, le ola ua lavea'iina ma ta'uamiotonuina, le ola ua faamamaina, e iloa pe afai ua moni le salamo. Foi nei loa e vivii, aua sa iai le Atua a o lei iai se mea e tasi, ua ia toe afio ifo foi, e faaola lana lava foafoaga mai le agasala.

Aua le amio faatasi ma le lalolagi. Ia iai pea i le lalolagi, ae le numia faatasi ma le lalolagi. O le viiga silisili lea, o le ola ia faia ai pea lona finagalo. Ona moni ai lea o lana tulafono: "Aua e te fai mo oe se atua ese i o'u luma." Afai e faapea ona fai, o le viiga faalausosoo lea ma le viiga faasoloatoa lea mo le Ta'ita'i malaga o lenei tausaga. Ia ifo mai le lagi le malamalama

faaleagaga ma susulu pei o le sulu i le pogisa e faamanino ai le alasa'o o le faiga malaga o lenei foi tausaga. Ae le uma ai le tu'ia, le ulufia, le fatuatia, o le a fetaia'i i le ala. 'Aua le mu itiiti le vavae o le vivii, aua na foaina mai e le Alii, ua aveeseina foi e le Alii, ia faamanuina le Suafa o le Alii. Aua na sau le lavalava mai le manava o le tina, o le a toe foi atu e le lavalava. Ae o loo tele pea mea e nonofo ai outou i le maota o lo'u Tama, pe ana leai po ua ou fai atu ou te alu e sauni se mea e nonofo ai outou.

Manuia le 2015 i le Laulau a le Fono Tele i le manuia mai le Ao o le Ekalesia, manuia foi Komiti Faatonu a Tama o le Ekalesia, manuia foi le Kolisi Faafaifeau ma a'oga uma, manuia le Soofaatasi, manuia tele faiva tapua'ia o le Tafatolu o le Faiga Malo. Manuia foi Sui o Malo mai fafo o loo i Samoa. Manuia maota o matua tausai ma maota gasegase uma. Manuia falepuipui ma le toefuata'iga. Manuia tuuaga a fanau. Manuia le sailiga malo a Samoa i fafo i tamafanau, ae ola le Sulu Samoa ma auauna o le Tala Lelei. Soifua.

Simona Perefoti FS,  
Etena Fou,  
Sagafili STEC,  
Mulifanua

---

## The Wonders of God's Creation

If common garden snails are getting your vegetables, it is no wonder. Snails have 135 rows of teeth located in their tongues, and each row contains 105 teeth. This comes to a total of 14,175 teeth, according to the National Wildlife Federation.

---

# MATINI LUTERU

1483 - 1546

## O le Auupega o le Toe Fuata'i

### O le Tetea a Tagata Lautele

A o vilivilita'i Matini Luteru e faataunuu le Toe Fuata'iga, ae peisea'i oloo vilivilita'i foi le Toe Fuata'iga e mulimuli ia Luteru. A o le vave lava o lona faataunuina o ni suiga fou i le Ekalesia, o le tupu a'e foi lea o ni lagona fou ia te ia i lona loto ma lona soifua i aso ta'itasi, amata mai i suiga i lo la va ma lona to'alua, faapea ma lona alofa tele mo lana fanau. O nei lagona ua tatala ai o ia mo ni suiga anoanoa'i na te le'i iloa ua faia e le Atua mo ia.

O le vilivilita'i o tagata nuu e saili ia suiga anoanoa'i i o latou tagata, na faatupu ai se vevesi na oo ina aafia ai Luteru. Ma o le mulimulita'i o tagata nuu ia Matini, na oo ina latou faaaogaina ai le Toe Fuata'iga e ala atu ai sa latou tetea i aiga tamalii o le atunuu. O latou ia e pule i eleele, pulea galuega i le malo, ma latou faaaogaina le malosi o tagata nuu e saili ai o latou manuia. Ua faaaogaina nei e tagata nuu le malosi o le Toe Fuata'iga, e finauina ai mea latou te mananao iai. Ua mananao latou te tofia o latou lava minisita, ma mananao foi e taofi le pulea faapologa o tagata nuu oloo galulue i faatoaga a i latou e ona eleele. Ua mananao foi ina ia latou maua se vaega o tupe e maua mai atiinae o latou faia i fanua o le 'au maumea.

Na malamalama lelei Matini i mafuaaga o le tetea o tagata

lautele, peitai na ia fautuaina i latou ina ia aua ne'i faaaogaina le pule malosi ma ni sauaga ma ni vevesi e faataunuina ai o latou mana'o. Peitai e le'i amana'iaina e le 'au tetea lapata'iga a Matini, a ua matua faatino lo latou ma'ema'ea. Ua le totogia ni a latou lafoga, ua latou gaoia lafu manu ma talepe ma gaoia mea totino i totonu o monaseri. O le i'uga, ua liliu atu le malosi o 'aiga o tamalii o le atunuu, ma osofa'i tetea, ma oo ina maliliu ai le to'a ono afe tagata lautele. Na taumafai Matini e faafilemu le vevesi ma ta'ita'iina mai tagata i le Satauro, peitai ona e le o le sini lea o lo latou ulua'i tetea, o le mea lea na le mananao ai e sui le sini o lo latou tetea i lea taimi. Ona tusi ai lea o se tusi e Matini i tamalii (nopele) o le atunuu, e Uiga i le Gaoia ma le Fasiotia o le Anoano o Tagata Lautele. Na ia fautuaina ai le 'au nopele ina ia latou ta'utino mai foi e iai foi o latou sese, tatalo mo le fesoasoani mai o le Atua, ma tuuina atu ni aiaiga lelei mo tagata lautele. Afai e le talia lea, ona faato'a faataunuina ai lea o le pule malosi e faasalaina ai tagata lautele tetea.

Na tusi Matini i nopele e faapea: Sasa ma titina le tetea a tagata lautele, i soo se auala, aua e leai se mea e sili atu ona oona, ma tiga, ma ti'apoloa, i lo le tagata faatautee. E pei lava ona tataua ona e fasimate i le ta'ifau fe'ai, a le faia, e faasaga

mai i le fasi oe ma ave ou eleele faapea ma oe.

Na faaoo e nopele le pule malosi ma tape ai le tetea. Ae na manatu Matini e le'i atoatoa le malamalama o nopele i le uiga moni o lona mana'o. O lea na ia toe tusi ai i nopele e uiga i le malosi tele o sauaga ua faaoo e i latou i tagata lautele. Na mana'o Luteru ina ia manino tamalii o le atunuu i o latou tiute o latou o Kerisiano e le gata ina taofia le tetea, ae tataua ona sosoo lea ma le faaalua o le alofa ma agalelei i tagata lautele, ma le agaga ina ia toe faalelei mea na faaletonu.

Ua tuua'ia nei e tagata lautele ia Matini Luteru ona o le malosi na faaoga e nopele e taofi ai le tetea a tagata lautele. Ae faasaga mai foi nopele ma tamalii o le atunuu ua tuua'ia Matini ma le Toe Fuata'iga faapea na latou feulaina le afi o le tetea na tula'i mai. Ua avea nei Matini, e pei lava o isi tagata galulue faaaposetolo, le faatutu atu iai o faitioga a tagata. Fai mai tagata o Matini e ulu malo, peitai ou te talitonu o uiga o le tagata Toe Fuata'i ua sauniunia ai o ia e tali atu i ni vesiga e tula'i mai. O le Au Toe Fuata'i, ua suia o latou tagata mai totonu ona o le misiona o latou tau'aveina atoa ma le sini o loo latou tautiga iai. O le mea lea na mafai ai e i latou ona aga'i atu pea i luma e ui lava oloo le malamalama le toatele o tagata ia i latou. Pei la o Matini, oloo itagia ma tuua'iina e nopele faatasi ai ma tagata lautele. Ae le gata i lea, o lona lava aiga atoa ma isi tagata Toe Fuata'i Porotesano.

---

# MATINI LUTERU

1483 - 1546

## O le Auupega o le Toe Fuata'i

Sa tuputupu a'e pea le ita o le pulega a le pope ia Matini Luteru, faapea foi ma le tupu o Salesa V (Charles V). E le malamalama le tupu pe aisea lava ua mafai ai e lenei tagata e toatasi, o Matini ma ona talitonuga, ona faavevesi tagata e toatele. Ua taumafai nei o ia e faataunuu le i'uga o se fono na faia i Worms, peitai o le piitia e tagata e toatele o talitonuga faa-lotu Luteru, ua na le mafai ai. Ua tutuli e le tupu faifeau lotu Luteru mai o latou falesa, peitai ua o atu i latou ma lauga i magaala ma luma o nisi o faletalimalo. Ua liua atoa nisi o aai tetele o Siamani e pei o Strasburg, Augsburg, Ulm ma Nuremberg, ma ma avea ma nofoaga maumaututu o le lotu Luteru.

Na taloina ni fonotaga tetele e taumafai ai e titina lenei galu malosia o talitonuga o Matini Luteru lea ua lu'ilu'iina faavae o le Ekalesia Katoliko Roma. Na faaiuina i le fono tele na faia i Okisipeta (Augsburg) i le tausaga e 1530. E le'i faatagaina Matini Luteru e auai atu iai, a ua taofia o ia i se tasi o maota i le taimi atoa o le tolu vaiaso o le fono. O perenise uma o itumalo uma o Siamani na auai. O i latou ia e iai le pule i le atunuu atoa, i lalo o le pule a le Emeperoa, poo le tupu. O le latou pule e tutusa ma le pule a Feterika le Poto, lea na te pulea le itumalo e iai Matini Luteru, o ia foi lea na ia faalafi

Matini i lona maota tele i Wartburg ina ua mae'a le fono tele i Worms. O perenise ia na latou tauaaoina atu le ta'utinoga faale-faatuatua. Ae le'i maua e le tupu, ma ua ia faatonuina ai le tafiese a o le faa-Luteru, poo talitonuga o le lotu Luteru. Ma ua faatonuina foi perenise uma ina ia toe ta'ita'iina atu o latou itumalo uma o Siamani i le Ekalesia Katoliko Roma.

Ae le'i talia e perenise! O se tasi o perenise na tootuli i luma o le Emeperoa ma faaali e faapea, e sili ia te ia le vavaeseina o lona ulu i lo lona aveesea o le Afioga a le Atua mai ona tagata. Na tutusa lelei le lotu toa o perenise o le malo, ma le lotu toa o Matini Luteru. Ma e le'i mafai e lea fono ona suia talitonuga faavae o le Toe Fuata'iga, e ui lava e le'i auai Matini. E ui lava e le'i talia e le Emeperoa lo latou mana'o, ae ui lava i lea, na te le'i mafai ona taofi le mea ua tupu nei i Siamani atoa, o le lofia o le atunuu atoa e le Lotu Luteru.

### Toe Faatulaga le Ekalesia

E fiafia lava ina ua malaga atu le Emeperoa i se fonotaga tau

taua, ma ua le lagona ai e Matini le mamafa o le tetee mai ia te ia. Ua faaaauu ona sui e Matini mataupu tau le lotu. Na amata atu i sauniga lotu. E le'i umi ae ia lagona le tatau ai ona faia se misasa i le Gagana Siamani. Ae sa faagesegese ona fai o suiga ona o lona talitonuga o le faavavevave ona sui mai i le faa-Latina i le faa-Siamani e ono le malilie ai i latou e vaivai lo latou faatuatua. Na ia silafia lelei lava e le lava le malamalama o tagata i mataupu faavae o le malo o le Atua ma oo ina ia tusia ai ni tusi se lua i le Gagana Siamani, tau mataupu silisili mo tagata matutua le isi, ae mo tamaiti le isi, latou te faitau ma suesue iai. O le manatu o Matini, o le tusi mo tamaiti, e pito atu lona taua i le Tusi Paia lea na ia faaliliuina.

Sa mana'o lava Matini ia i latou sa mulimuli i le Toe Fuata'iga, ina ia latou malamalama i le Tala Lelei ma le malo o le lagi, i le faamalasia lea o le taulotoina o mataupu silisili. O le le maua o se vaega ua tuuina atu e tauloto o mataupu silisili, o le a le avatua ai sau meaai poo se meainu mai lou pule i le galuega, pe mai ou matua foi.

mai le tusi: God's Generals  
tusia e Roberts Liardon,  
faamatalaina e  
Afemata T. Apelu Aiavao

---

## TRUST

That the Almighty does make use of human agencies and directly intervenes in human affairs is one of the plainest statements in the Bible. I have had so many evidences of His direction, so many instances when I have been controlled by some other power than my own will, that I cannot doubt that this power comes from above.

(Abraham Lincoln)

---

---

# O le Tusitala o le Evagelia a Luka

*mai le itulau e 2*

Lelei sa maua e Luka mai la la mafutaga ma fesoootaiga ma Mareko i Anetioka, ina ua o atu Paulo ma Panapa, ma ave atu Mareko (AD 44). Sa iai faatasi Luka ma Mareko (Gal 11:19-29) i le faafalepuipuiina o Paulo muamua i Roma. (Kol. 4:10;14. Filemoni 24) Sa iai foi Luka ma Mareko i le faafalepuipuiina lona lua o Paulo i Roma (2 Tim 4:10-11) O Mareko sa ia faalogo ma aoaina le Tala Lelei sa folafola ma tala'i e Peteru. E iai le manatu, a o iai Luka faatasi ma Mareko i Roma i faasalaga uma nei o Paulo, ma o Roma foi na tusia ai e Mareko lana Evagelia, o lona uiga sa maua e Luka se kopi o le tusi a Mareko (AD 60s).

E iai foi le talitonuga o le au susesue, afai na iai Luka i Roma i le vaitau lea o le AD 61-62 ma le 67, (a o faasala faa-falepuipui Paulo) e tataua ona iai se feiloaiga a Luka ma Peteru. Sa iai Peteru i le vai taimi tonu lea, ma o i foi na tusia ai lana tusi muamua ma le tusi e lua, (AD 62-64 ma le AD 66-67). Afai sa iai Luka i Roma i le taimi lea, e mafai foi ona ia maua faamatalaga i le Tala Lelei sa folafola ma tala'i e Peteru.

I le malaga a Paulo ma Luka e ave le fesoasoani tupe mo le Au Kerisiano i Ierusalem, sa feiloai ai ia Iakopo le uso o Iesu ma toeaia o le Ekalesia (Gal 21:18). E iai le manatu sa tele se silafia na maua e Luka e uiga i le TalaLelei ma e le gata i tama, aposetolo ma le auuso Kerisiano o e sa molimauina le galuega tala'i a Iesu Keriso.

E le mafai ona tuueseina le taua o le galuega a le Agaga Paia ia te i latou sa tusitusia ma faamauina galuega faaola a le Alii. (Ioane 14:26). "A o le fesoasoani o le Agaga Paia lea, e auina mai e le Tama i lo'u igoa, o ia lava na te a'oa'oa ia te outou i mea uma lava, e faamanatu mai foi o ia ia te outou i mea uma ua ou fai atu ai ia te outou...."

## 4. Taimi ma le Nofoga sa Tusia ai le Tusi a Luka

E le o matua iloa tonu le aso/tausaga sa tusia ai. Peitai e mafuli le toatele o se vai tau i le AD 66-69. O le vai tau sa tusia ai le tusi a Mataio o le AD 50-59, sosoo ai Mareko i se vai tau o le AD 64-65. Afai sa tusia le tusi a Luka ina ua uma le maliu faamaturu o Paulo i le AD 67-68 o lona uiga ua talafeagai foi le vai taimi lea.

E tele foi le sao ma le fesoasoani o le tusi a Ioane e tau fua iai le taimi o le tusi a Luka. Aua o le taofi taatele, o le Evagelia a Ioane na tusia i le AD 85. O lona uiga, na tusia le tusi a Ioane ua tele lona iloa o Evagelia a le Au Sinopi (Synoptic Gospels). Afai o lea le taofi lautele o le au susesue, e talitonu o le tusi a Luka, Mataio ma Mareko sa tusia e lei oo i le tausaga AD 85. O le nofoga ma le mea na tusia ai le tusi, e le o matua mautinoa lelei foi. O le manatu o le vaega e ta'ua o le (Ani-Marcionite Prologue), o Akaia i Eleni le nofoga tonu, Peitai e le o matua talia e le toatele o le au susesue o le Feagaiga Fou lea tulaga. O nisi oloo taofi a le o Anetioka i Suria, o Roma i Italia, poo Kaisaraia Filipi.

## 5. O le Autu o le tusi a Luka

"O Iesu, o le Faaola o tagata uma na afio mai e saili ma faaola e o leiloa...." (Jesus, the universal Savior, came to seek and to save the lost.)

## 6. Uiga ma Foliga o le tusi a Luka (Characteristics of the Gospel of Luke)

Oloo faatauaina e Luka le alofa faamagalalo (gracious forgiveness) o le Atua i le soifua o Iesu le Nasareta. O le taimi muamua oloo ta'ua ai e Luka saunoaga ma upu alofa a Iesu (Luka 4:22), "Ua latou vivii uma ia te ia, ua ofo foi i upu alofa na pa'u mai i lona fofoga." O le alofa faamagalalo o Iesu na papa'i o'oo'o i soo se mea o lana galuega faaola, (Luka 7:36-50) o le fafine agasala na faamagaloina e Iesu. O le faata'oto i le atalii faamaumau 'oa (Luka 15:9-31, o le ata manino lea o le alofa faamagalalo o le Atua, na te talia ai ma le olioli le tagata agasala e salamo ma foi atu ia te ia; o le faresaio ma le ao lafoga (Luka 18:9-14) o molimau mautinoa ia o le alofa faamagalalo o le Atua, na ia talia ai soo se tasi sa le amanaia ma tuulafoaina. O le faataoto i le mamoe na leiloa ma le tupe na leiloa oloo faaali manino mai ai le olioli ma le fiafia o le Alii ina ua maua le tagata sa leiloa. O saunoaga ia Sakaio oloo ta-aofa'i ai le atoaga o lona alofa saili ma lona alofa faaola i le lalolagi. "Aua o le Atalii o le tagata na afio mai o ia e saili ma faaola i le na leiloa." (Luka 19:10) i luga foi o le satauro, na ia talia ai le pagota i le Parataiso faatasi ma ia.

Oloo ta'ua e Luka le teena  
*faaauau itulau e sosoo ai*

---

# O le Tusitala o le Evagelia a Luka

*mai le itulau e 7*

malosi e Iesu o tu'inauga i le 'oa, le tamaoiga ma mea o le olaga, a ia tuu le faamuamua a le tagata e saili ai le Malo o le Atua ma lana amiotonu, ona faaopoopoina ai lea o ia mea uma (Luka 12:22-31). O le faataoto i le lulu saito (Luka 8 5-15) oloo fetalai ai Iesu e uiga i le saito, o le Upu ua faaleagaina ma le amana'iaina ona o le atuatuvaale ma le popole o le tagata i le 'oa ma tamaoiga. O le faataoto i le uii faamaumau 'oa (Luka 15:11-32) oloo teena ai e Iesu le manaotele i le 'oa ma tu'inauga o le olaga, e avea ma ala e leiloa ai le tagata. Na faapea foi ona fetalai Iesu e uiga i le faataoto o le faaputu 'oa (Luka 12:16-21), e mau'oa i mea o le olaga ae mativa i tamaoiga ma 'oa a le Atua. E faapea foi i le tala ia Lasalo ma le mau'oa. (Luka 16:19-26), oloo faaalua manino mai ai, e leai se aoga e maua ai e le tagata le lalolagi ma ona tuinauga ae maumau ai le ola. I le Luka 16:13 "E le mafai e se auauna ona auauna i alii e toalua, aua e inoino o ia i le tasi, ae alofa atu i le tasi; a le o lea e faapipii atu o ia i le tasi, ae faaleaoga i le tasi. Tou te le mafai ona auauna i le Atua atoa ma oa." O lona uiga, e taua le 'oa ma tamaoiga o le olaga, a ia 'auna ne'i avea ma atua i le tagata.

Oloo faamatalaina ma faatauaina e Luka le galuega a le Agaga Paia e pei ona faaalua i le galuega a Ioane le Papatiso (Luka 1:15-17) i le soifua ma le galuega a Iesu (Luka 1:35; 3:16; 22,4:1; 14:18; 10:21, i le soifua

o Elisapeta (Luka 1:41 & 42) i le faatuatua o Sakaria (Luka 1:67-69) i le ola vivii o Simeona (Luka 2:25-35) aua le galuega ma tofotofoga o le ausoo (Luka 12:10-12; 24:49).

O le soifua tatalo, o le isi lea o mea taua oloo faamamafaina e Luka, aua o Iesu o le tagata tatalo. E sili atu ona tele tatalo a Iesu i le tusi a Luka, nai lo se isi lava Evagelia. (Luka 3:21; 5:16; 6:12; 9:18; 9:28-29; 22:31-33; 22:44-46; 23: 34,46. Sa faapea foi ona a'oa'oa atu Iesu i le taua o le soifua tatalo. (Luka 11:1-13; 18:1-8; 18:9-14; 22:39-40).

Oloo faataua foi e Luka le amana'ia e Iesu o tina ma tama'ita'i i lana galuega tala'i. E pei o Elisapeta (Luka 1:24-25; 1:41-45; 1:57-60), ma Maria (Luka 1:26-56). O le tala i le fanau mai o Iesu oloo faamatalaina mai ai le tiute faatina o Maria. (Luka 2:1-38). O le tala i le sailia e Iesu o ona matua. (Luka 2:41-51), oloo ta'ua ai le taua o le galuega faatina. E na o le tusi a Luka oloo ta'ua ai le perofeta fafine o Ana (Luka 2:36-38), o le tina o le ava a Simona -Luka 4:38-39), o le tasi foi fafine ua oti lana tane mai Naina, o le na alofa mutimutivale iai Iesu i lana tama ma ia toe faatu mai le oti (Luka 7:11-17). E faapea foi le tala i le fafine agasala na ia soloi vae o Iesu i lona laulu ma sogi i ona vae, o le faailoga lea e faailoa ai lona alofa ia Iesu ina ua ia faamagaloina ana agasala. (Luka 7:36-50). Oloo ta'ua foi nisi tina sa mulimuli ia Iesu ma fesoasoani i lana galuega tala'i. (Luka 8:1-3). O le afafine foi o Iairo le pule o le sunako na toe faatuina e Iesu mai le oti, ma le tasi fafine sa ia te ia le puna toto

i tausaga e 12 ua faamaloloina o ia. (Luka 8:40-56). O le tala ia Maria ma Mareta (Luka 10:38-42) faapea ma le fafine sa ia te ia le agaga e vaivai ai i le sefulu valu tausaga, na faamaloloina e Iesu i le Aso Sapati. (Luka 13:10-17). Na faaaogaina foi e Iesu le tina i lana faata'oto i le tupe na leiloa (Luka 15:8-10). E faapea foi le faataoto i le fafine ua oti lana tane ua le malolo lona faatauina i le faamasino ina ia faamasino i ana mea. Na a'oa'oa Iesu i ona soo i lea faata'oto, ina ia aua le faavaivai i le tatalo i aso uma e le aunoa e faapei o le fafine ua oti lana tane (Luka 18:1-18). E iai foi le fafine ua oti lana tane ma lana taulaga na ave mo le Atua. O se tala faatusatusa ua faaaogaina ai e Iesu se tina e fai ma faata'ita'iga lelei o le ola fai taulaga, o le faatuatua ma le alofa moni i le Atua. (Luka 21:1-4). O le tala i puapuaga o Iesu oloo ta'ua ai fafine Ierusalem sa taufai tagitu'i ma taufai tagiaue, a o ta'ita'i atu le Alii e faasatauroina. (Luka 23:27-31). E iai foi fafine Kalilaia sa latou molimauina le faasatauroina ma toe taimi o Iesu, faapea le tuugamau na tuuina iai o ia (Luka 23:49,55,56). O fafine foi na latou asia le tuugamau i mea manogi i le taeao o le Eseta, o i latou foi na faalogo muamua i le Tala Lelei ua toe tu Iesu (Luka 24:1-11).

O oototoga ia o le tusi oloo faailoa mai ai le faatauaina e Luka o tina i le galuega faaola a Iesu. Sa faaaogaina foi e Iesu tina i ana faataoto e fai ma faataitaiga lelei i ona soo e uiga



---

## O le Tusitala o le Evagelia a Luka

i le ola saili i le Atua i le tatalo, faatuatua ma le salamo.

### O le Faata'otoga o le tusi a Luka

Faatomuaga: Luka 1:1-4.

Vaega I: Luka 1:5-4L13 - O le Faaola mo tagata uma.

Vaega 2: Luka 4:149:50 - O le galuega faatino a Iesu i Kalilaia e saili ma faaola e o leiloa.

Vaega 3: Luka 9:51-18:30 - O le galuega mulimuli a Iesu i Iuta ma Perea e saili ma faaola e ua

leiloa.

Vaega 4: Luka 18:31-19:27. - Ua aga atu Iesu i Ierusalem e saili ma faaola i e ua leiloa.

Vaega 5: O le galuega mulimuli a Iesu i Ierusalem e saili ma faaola e o leiloa.

Vaega 6: Luka 22:1-23:56 - O puapuaga ma le maliu o Iesu ina ia faaolaina e o leiloa.

Vaega 7: Luka 24:1-53 - O le toetu ma le afio a'e o Iesu o le Faaola Manumalo mo e ua talia le saili ma le faaola mai o le Alii Faaola.

### Aotelega:

Ou te fia aumaia le autu aoao

o le tusi e fai ma lu'itau mo lenei mafutaga aemaise le galuega tala'i a le Ekalesia. "O Iesu, o le Faaola o le lalolagi, na afio mai e saili ma faaola e o leiloa". O le misiona a le Ekalesia ma tagata lotu, ia saili ma faaola i agaga (tagata) e leiloa, o le a le tulaga o iai nei le galuega saili a le Ekalesia? Afai o lea e faatupula'ia le o ese atu o tagata lotu i isi tala'iga, faamata e le o lava/lelei auala oloo faaogaina e saili ai?

O le faamoemoe o le Alii e ana le Tala Lelei, e saili ina ia faaola le tagata. O le faamoemoe foi lea o le Ekalesia a Keriso, a o tumau ea le moni/sa'o o lenei faamoemoe i le galuega faaola a le Ekalesia?

---

## O se Ta'iala Aoga mo lau Tatalo

Ieremia 29: 13: "E saili mai outou ia te au, tou te maua foi, pe a outou saili mai ia te au ma outou lotu atoa."

E malosi lou ola tatalo? O e manuia ai? O e matauina 'o 'e maua ai ni faamanuiaga mo oe? Afai e leai, ona sili ai lea ona e faitau i le fautuaga a se tagata Farani na soifua i le senituri e 17, o Francois Fenelon. Ua ia faaali mai pe faapefea ona tatou tatalo ina ia tatou maua ai tali mai le Alii.

"Ta'u i le Atua mea uma oi lou loto, sasaa uma, o ou fiafiaga ma ou tiga, pei o e talanoa i se uo pele. Ta'u i le Alii ou faafitauli ina ia mafai ai ona ia faamafanafana ia te oe; ta'u iai ou moomooga ina ia mafai ai ona ia faamamaina ou lagona; ta'u iai mea e te le fiafia iai ona ia fesoasoani mai lea ia oe ina ia e mafai ona fo'ia; ta'u iai ou faaosoosoga ina ia mafai ona ia puipuia mai ai oe; faaali iai manu'anu'aga o lou loto ona ia

fofoina lea; matua fofola i ona luma ou mana'oga leaga ma lou le mautonu i le olaga o e iai. Ta'u iai lou manatu faapito lea e ala ai ona e le amana'ia isi tagata.

A faapea ona e sasaa atoa uma atu ou vaivaiga, mana'oga ma faafitauli, e oo lava ina e lelei i le mea e tatau ona e tatalo ai. 'A 'e le nanaina se mea mai le Atua, ona faatupuina ai pea lea o mea e mafai ona lua talanoa ai ma le Atua. O le mea lea a e tatalo ai, e te tatalo i le faatuatua, ma lou talitonu, e faafofoga mai le Atua.

---

## E Mafai ona Suia lou Amataga

Kenese 39: 2: "Sa iai le Alii ia Iosefa".

E le o se aiga lelei na tupuga mai ai Iosefa. O ia o lona sefulutasi o le fanau a Iakopo, o se tagata fai togafiti. Peitai o le taimi lea o le laitiiti o Iosefa, ua tulaga lelei ai le ola faaleagaga o lona tama o Iakopo. A o ona atalii matutua e toa sefulu, na soo uma lava i lo latou tama le fai togafiti, ma

taunuu ai lava le upu, "e soo lava le moa sope i le moa sope". Na latou faaseseina ma fasiotia tamaloloa uma o se nuu ona o se tasi o latou na ia tosoina ma faamalosi lo latou tuafafine. (Ken. 34). A o lea o le a latou toe faia foi se isi mea leaga, o le faatauina atu lea o Iosefa e fai ma pologa. Ae ui lava i lea, na ave mulimuli ane Iosefa ma tagata aloa'ia ma faaaloaloga.

O le a le mafuaaga? O le tali: e mafai ona e manumalo i le ituaiga olaga na e sau ai. Vaai foi ia Iosefa! E le taumate na teena oe e tagata o lou aiga, pe oo ane foi ina e iloa o tagata sa e faatuatua e le lelei. O le tala lena ia Iosefa. Peitai, "Sa iai le Alii ia Iosefa". O upu ia na suia atoa mea uma. Tusa lava poo le a le mea na tupu ananafi, a tumau lou faamaoni i le Atua, na te fesuia'i le aso a taeao e fai

*faaauau itulau e 13*

---

## *A Page for Youth*

# ITULAU MO TUPULAGA TALAVOU

---

*O le Mafuaaga o le Pese:*

## Rescue the Perishing

*mai le itulau muamua*

### **Upu mai le Tusi Paia:**

**Isaia 61:1-3:** “Ua i o’u luga le Agaga o le Alii le Atua, aua ua faauuina a’u e le Alii e tala’i le tala lelei i e ua tigaina, ua ia auina mai a’u e fusifusi i e loto momomo, e tala’i le saolotoga i le tafeaga, ma le matua tatalaina o e ua fusifusia. E tala’i le tausaga e tali leleia mai ai e le Alii, ma aso e tau ai ma sui e lo tatou Atua; e faamatalaloto i e ua faanoanoa uma lava, e avatu le fialia i e faanoanoa i Siona, e foaiina atu ia te i latou le matagofie e sui a’i le lefulefu, o le uu o le olioli

e sui a’i le faanoanoa, o le ofu e fai a’i viiga e sui a’i le loto faavaivai, e igoa i latou, o laau o le amiotonu o le faatoaga a le Alii, e fai mona viiga.”

O le pese leni na tusia e le tusi solo (poet) tauaso Amerika o Fanny J. Crosby, o se tama’ita’i sa tele ina faaigoaina e tagata ‘o le masiofo o le ‘au tusi pese o le tala lelei.’ E ui lava faato’a ia amata fatuina pese faa-eva-gelia ina ua 44 ona tausaga, ae na atoa le 8,000 pese faa-eva-gelia na ia tusia a o le’i valaauina o ia e lona Matai ina ua 99 ona tausaga, ia Fepuari 1915. O lana tala leni i le mafuaaga na ia tusia ai leni

pese:

Na ou tusia le *Rescue the Perishing* i le tausaga e 1869. O le tele lava o pese na ou tusia e mulimuli i ni mea na ou matauina i le galuega a le ‘au Kerisiano i Niu Ioka. Sa ou lauga i se potopotoga o ni alii faigaluega i se afiafi o le tau mafanafana, ae pei lava e vanevane mai a’u e se manatu, e le taumate oloo iai se tama a se fafine o auai i lea faatasiga, e na te mana’omia le faaolaina. Ona ou faaali lea faapea, afai lava o iai i le potopotoga se tama talavou ua sola’ese ma lona tina ma ana a’oa’oga, e tataua ona sau ma te feiloa’i pe a uma le sauniga. Ona sau ai lea o le tama e 18 ona tausaga ma fai mai, “O a’u e faatatau iai lau saunoaga? Na ou folafola i lo’u tina faato’a ma toe feiloa’i i le lagi.”

Na matou tatalo mo le tama. Na tu i luga ina ua uma le tatalo, ua fialia ma fai mai, “O le a ou feiloa’i moni la i lo’u tina aua o lea ua ou maua le Alii.”

O nai aso muamua ane na avatu ai e le fatupese o William Doane (Ioane) se manatu na fai ma faavae o le pese fou: “Rescue the Perishing”, mai le Luka 14:23: A o o’u nofonofa i le fale o le aulotu i lea afiafi, ae oo mai i lo’u mafaufau laina o le pese: “Rescue the perishing, care for the dying...” E alu lena po o o’u mafaufau i upu ia. Ina ua ou oo i lo’u aiga na amata ai lava i le taimi lea ona ou galue i le tusiga o le pese. Faato’a ou moe ina ua mae’a ona tusia. O leni pese na ulua’i lomina i le tusipese a William Doane - *Songs of Devotion* - i le tausaga e 1870.

Pei lava o isi viiga o le Atua

*faaauau itulau e sosoo ai*

---

## Rescue the Perishing

Rescue the perishing, care for the dying, Snatch them in pity  
from sin and the grave; Weep o’er the err-ing one, lift up the  
fallen, Tell them of Jesus, the mighty to save.

Tho they are slighting Him, still He is waiting, Waiting the  
penitent child to receive; Plead with them earnestly, plead with  
them gently, He will forgive if they only believe.

Down in the human heart, crushed by the tempter, feelings lie  
buried, that grace can restore; Touched by a loving heart,  
wakened by kindness, Chords that are broken will vibrate once  
more.

Rescue the perishing, duty demands it - Strength for thy labour  
the Lord will provide; back to the narrow way patiently win  
them, Tell the poor wand’rer a Savior has died.

Chorus: Rescue the perishing, Care for the dying; Jesus is  
merciful, Jesus will save.

---

## *A Page for Youth*

# ITULAU MO TUPULAGA TALAVOU

---

## Se 'Aua!

o'u alafau. A o o'u savali i le alatele ae ou faalogo mai o valaau atu lo'u tina, "Tani, alu atu lou tuagane lua te o." Ua matua vevesi lo'u mafaufau i le taimi lea, a o lea ua faaopopo atu foi ma lo'u tuagane i le ala. O le mea lea na ou iloa ai e le iloa e o'u matua le mea o o'u iai, ma mafatiaga o o'u tau'aveina. E tasi lava le mea e fai mai ai ia a'u, o le alu atu o lo'u tuagane ma te o i soo se mea ou te alu iai, pe fai mai foi ou te tago e teu lo'u moega ma lo'u potu. La te le iloa lava mafatiaga o o'u tau'aveina.

Na ou savali i le auala ma ou aga'i i le fale o la'u uo o Maika. Na ou mafaufau ou te alu ou te faamavae ma faatofa iai. Ua ou te toe fia ola!

Ua le mafai ona ou onosa'ia le le malamalama o tagata i mea ou te mana'o iai.

Na tatala mai e Maika le faitoto'a, ma matua fusi atu a'u, a o lo'u tuagane, lea ua tamo'emo'e atu ma alu ua ta'a'alo ma uso laiti o Maika.

Na ma o ma Maika i lona potu ma ma nonofo i luga o lona moega, ma tago mai ma toe fusi atu a'u ia ia. E le'i fesili mai pe o le a le mea ua tupu, pe taumafai foi e faafiafia a'u, na o le nofo lava ma fusi a'u, a o o'u tagi i luga o lona tau'au. Na ou tagi ona ou te manatu e le malamalama lava lo'u aiga i mea ou te mana'o iai. Ona o le umi o se taimi o o'u tagi, ua pei ai foi ua masaa atu ai foi ma tiga sa ou maua ai. Ua pei foi le tagi, ma loimata maligi o se fofo i o'u lagona tiga. Faaopopo atu iai ma le sasaa atu

o ou lagona ia Maika lea na te fusiina au. Na ou telefoni i lo'u tina, ae tali 'ava'avau mai i luga o le telefoni ia a'u, ma fai mai ua te'a mamao le taimi sa tataua ona ou fo'i atu ai i le fale. Peitai, ua ou le faamisamisa iai i lo'u tina, a ua ou tago atu ua 'u'u mai le lima o lo'u tuagane, ma ma o loa i lo matou fale. Ua ese lava o'u lagona i lea taimi a o ma savavali. Ua filemu lo'u mafaufau. Ona ou ta'uina ai lea i lo'u tuagane mea uma o o'u mafatia ai. O se mea lea e le masani ona tupu. Ua sasaa atu o'u mafaufauga i si o'u tuagane laitiiti ailoga e malamalama lelei iai. Faato'a ou talanoa lava lea faapea i si o'u tuagane.

E le'i ita mai pe le fiafia ia a'u. E le'i fai mai foi e sese mea ia ou te fai atu ai. Ae ou te vaai atu, ua tafetafe malie ifo ona loimata i ona alafau a o le'i fai mai sa na tala. Ona fai mai ai lea, "Se 'aua! Aua e *faaauau itulau e sosoo ai*

---

## Rescue the Perishing

na tusia e Fanny Crosby e matua lu'itauina ai lava lagona o le tagata, o lea na avea ai foi lenei pese ma ala o le salamo o tagata i le tele o faatasiga faa-Evagelia i le lalolagi.

Na tusia e se tasi fai-Evagelia o D.L.Moody i lana tusi "My Life and the Story of the Gospel Hymn" e faapea:

O se po timuga ma le matagi ae tifatifa atu se tamaloa i le fale o le faifeau. E ona, e foliga mai e tele ni aso e le'i ta'ele, e le selea le 'ava, ma lavalava e matua palapala lava ma masaesae. Na nofo ifo i le nofoa, vaavaai solo pei e taumatamate pe o fea lea mea o iai. O le taimi lea oloo usuina le pese *Rescue the Perishing* ma

isi pese. Pei ua faamanatu mai e ia pese i le tamaloa ni mea sa masani ai a o laitiiti. A o faamatala e le ta'ita'i le tala ia Iesu na afio mai e saili ma faaola i tagata agasala, na matua faalogologo lelei lava le tamaloa i faamatalaga a le ta'ita'i, fai mai o ia sa fitafita i le taua.

Ina ua uma le sauniga, sa toe tifatifa atu le tamaloa ona i luma ma fai atu, "O anafea na e iai i le 'autau lea?"

Tali le ta'ita'i, "I le taimi o le taua atoa."

"E te manatua le igoa o le kapeteni o le vaega'au na e iai?"

Tali le ta'ita'i o le sauniga, "Ioe! O lona igoa o .....!"

Fai mai le ona, "O a'u lenei!

O a'u o lou kapeteni. 'A 'e vaavaai mai nei ia a'u, ua matua leaga le mea ua ou oo iai. Ua malepe lo'u aiga ma leiloa uma mea sa ia te au ona o lo'u inu'ava ma ona, ma ua ou le iloa pe o fea a ou sulufa'i iai."

O le po lava lea na faaolaina ai le tifatifa le ta'ele. Ma amata ai ona ia faamatala pea lava pea le tala i lona tifatifa atu i le sauniga faa-eva-gelia ma ona lavalava palapala ae ia faalogoina ai le pese "Rescue the Perishing", o usuina e le potopotoga.

---

### Good Writers

**Good writers are not those with the largest vocabulary of difficult words, but those who have mastered the simple words.**  
(Gustav Hasford)

---

---

*A Page for Youth*  
**ITULAU MO TUPULAGA TALAVOU**

---

## O Tusi Mai ia Musi

*mai le itulau muamua*

leo o le ono tausaga le matua o Julie ona o le pisapisao o tamaiti ma teineiti i le fe’ei fiafia ma lau a latou tusi mai le meli. Na lagona e Linda le tina o Julie le tala lea a lana tama a o tu i le mea o tufa ai le meli. O teineiti uma lava i le vaega a Julie i le camp, na maua a latou tusi, tasi pe lua, e iai foi isi e ta’i tolu a latou tusi na maua, ae aunoa ma se tusi na maua e Julie.

Na iai ma tusi i le taga meli sa faatuatusi mai i le tina o Julie faapea: Mrs Linda Wagner. E tumu i tala faa-tagata matutua. O Linda o se faufautua mo teineiti matutua, ma a taunuu atu ana tusi, o lana mea masani e fai, o le faitau faatasi lea o ana tusi ma lana tama o Julie. Peitai, e le tutusa lava ma le iai o se tusi a Julie lava ia e faitau e ia lava ma fiafia ai.

Na iloa lelei lava e Linda le le fiafia o lana tama ona o le leai o sana tusi na maua, poo le leai o

---

## Se ‘Aua!

te pule i lou ola!” Ona tagi leotele ai lea ma faapa’u mai ia a’u.

O le taimi lea, ina ua ma savavali aga’i i lo matou fale ma ma ‘u’ulima ma si o’u tuagane, na fai ai la’u filifiliga, ou te le pule i lo’u ola. Ou te fia ola.

O le aso na sosoo ai, na faamanatu ai lo’u 15 tausaga!

tusia e Dani Allred

se isi e tusi mai ia ia.

O le aso la lenei, na matauina ai e Linda lana tama, ina ua le maua sana tusi, ona liliu ai lea ma savali aga’i i lona moega. Na taoto ma tago atu i lana tusi ma tatala ma faitau.

Na iloa e Linda o le faitau e lana tama o le tusi faitau, o le taumafai lea e faate’a ai lona le fiafia. Na alu atu iai ma fai atu, “Ou te iloa lou le fiafia ona o le le maua o sau tusi. E pisi tele lou tama i lana galuega, o lea foi ou te inei e le mafai ai ona ou tusi se tusi mo oe. E iai se isi e te fia tusi iai, ae maua mai ai sau tusi pe a tali mai? O lea na fai mai lou tama i lana tusi lea na ou maua, fai mai ua misia lava oe e la’ua ma lau maile o Musi.”

Fai mai loa Julie, “A na mafai foi e Musi ona tusi mai ia a’u!” O le tala lea a Julie na manatu ai loa Linda, o le a nofo i le po lea ma tusi se tusi a Musi ia Julie. Ma o le tusi lea:

“Mo Julie,

Pisi tele lou tama, ona fai mai

lea ou te tusi atu ia oe. Na alu lou tama ma faatau mai mea’ai a maile e tolu mo a’u. Ona sau lea moa le tatou fanua. Ua le pisa lava lo tatou aiga ona ua e le iai.

Alofa atu. Musi”.

Na matua fiafia Julie ina ua taunuu atu le meli i le aso na sosoo ai, ae lau atu lona igoa. Na fesili isi teine ia Julie, “O ai e aumai ai lau tusi?”

“Mai ia Musi, la’u maile.”

“E iloa mo’i e lau maile tusitusi?”

“Ioe! Ia vaai i lana tusilima lea!”

O aso mulimuli ane ai, na o le tumutumu o teineiti e faalogologo a o faitau e Julie tala malie a lana maile e fai atu i ana tusi.

O le tau mafanafana na sosoo ai, ina o le a alu Julie i le isi foi tafaoga, na fai atu ai i lona tina a o le’i alu, “Mama, manatua e lafo atu tusi a Musi ia e te nofo ma tusi.”

Na ata Linda ua mate’ia e lana tama lana mea lilo, ma sogi faatofa atu i lana tama.

---

## *E Mafai ona Suia lou Amataga*

ma faamanuiaga. O le toatele o tagata sa sauaina, e tele lava ina faatutu lo latou ita i tagata na latou faia mea leaga ia i latou, ma faatalitali e faatoese mai pe fai mai se leleiga. A o le tele o mea faapea, e le taunuu i mea ia e te moomoo iai. Afai na fai mai ni uiga leaga ia te oe, alu i Le na te le sauaina oe! O ia lea o loo faatalitali na te faamalieleina lou mana’o i mea lelei. Sulufa’i i le Atua.

E iai lava ni mafutaga e le

mafai ona toe faaleleia. Pe le toe oo foi i se lelei lou tou va ma ou matua. Pe umi foi se taimi o e faatalitali i se leleiga.

A o le Atua, e le mafai ona e tuuina i se pa ma loka ai. E avanoa le Atua mo oe i taimi uma e te faatuatua ai ia te ia. O le mea lea, faalagolago i le Atua. Afai e ‘au ma i tatou le Atua, o ai se faasaga tau mai? (Roma 8: 31). O le mea lea, a ‘au le Atua ma i tatou, o le mea taua lea.

---

# O Hosea ma lana Ava Talitane

*mai le itulau muamua*  
pepelo ia te ia i o latou gutu, ma ua latou faa'ole'ole ia te ia i o latou laulaufaiva. E le'i tutumau foi o latou loto ia te ia, e lei faamaoni foi latou i lana feagaiga. A o ia ua alofa mutimutivale, ua ia faamagaloina a latou amio leaga; na ia le faaumatia ai i latou; ua liliuese faalasi e ia lona to'asa, na ia le faatupuina foi lona to'atama'i 'ato'atoa; aua na ia manatua, ua na o tagata lava i latou; o le matagi oloo mavae atu, e le toe fo'i mai lava."

Na valaauina e le Atua le perofeta o Hosea e nonofo ma le fafine talitane. E mafai ona tatou vaai atu faale-maufaufau i se ata o se ulugalii e faapea e perofeta le tamaloa ae fai amio le fafine. E matua le fetau lava o la uiga. O le perofeta a le Atua

le tamaloa, a o le uo a Satani le fafine.

Pe ua faafia ni fia ona fo'i mai le fafine ma ni ana faato'esega se fia, ae tumau pea le mafatia o le tamaloa i le vaai atu ua toe alu foi i isi tamaloloa. Pe mafai e le perofeta ona ia talitonuina faato'esega a le fafine, ma ana tagi salamo ua faafia ona fai?

O tiga na lagona e Hosea e faatusa iai tiga na lagona e le Atua ona o lana faato'a nofotane, o Isaraelu, ua fulitua mai ia te ia.

I le Hosea 6:f1 oloo ua taumafai ai le perofeta e tuu upu o le loto salamo i gutu o ona tagata: "O mai ia, ina tatou toe foi atu i le Alii, aua o ia ua na saeia, na te faamaloloina foi i tatou, ua ia fasia, na te fofoina foi i tatou."

O nai fuaiupu o sosoo mai

mulimuli ane, tatou te faitau ai ua lulu le ao o le Alii ma faapea ane: "Efaraima e, se a ea se mea ou te faia ia te oe? Iuta e, se a ea se mea ou te faia ia te oe? Aua ua pei o le puao i le taeao la outou amio lelei, e pei o le sau foi i le vaveao ona mavae atu."

O lesona o le talafaasolopito o Isaraelu mai le Salamo 78, tatou te maua ai, e mulimuli Isaraelu i le Atua na o a latou upu. Na latou iloa lelei upu e fai atu, ae latou te le iloa ona ola ai. E o mai i le malumalu o le Atua ma a latou taulaga, ae latou te le ofoina atu i le Atua o latou loto. f6: "Aua o le alofa ou te loto iai, ae le o le taulaga; ia iloa foi le Atua e sili lea i lo'u manatu i taulaga mu."

E toatele lava tatou e ola faapea e pei o Isaraelu. A o le finagalo o le Atua, ia matua malosi ma mafana le alofa feofofoa'i i lo tatou va ma ia.

---

# O Lou Lima - "Teacher, it's your hand!"

*mai le itulau muamua*  
faamatala mai ai se faiaoga o le vasega amata, na ia faatonuina lana vasega e tusi le ata o soo se mea e fia faafetai ai. Na manatu le faiaoga, o nei tamaiti mai vaega matitiva o le aai, ailoga e iai ni mea latou te manatua e tatau ona latou faafetai ai, ona o le matitiva o o latou aiga. Ae na talitonu o ia e le taumate o le toatele o latou o le a tusi mai ni ata o ni moa, poo ni lupe ua uma ona faavela ma laulauina i luga o le laulau 'aiga. Ae na te'i le faia'oga i le ata na tuuina atu e Tolasi - o le ata o le alofilima.

A o le lima o ai? Na tumu ane tamaiti ma matamata i le ata

pi'opi'o solo o le lima na tusia e Tolasi. Fai mai le isi tamaitiiti, "Ai o le lima o le Atua, aua na te aumaia meaai mo tatou." Fai mai le isi tamaitiiti, "O le lima o le fama, aua e fai ana lafu kusi lea e maua ai kusi tatou te aai ai." Ua faaauau le tusiga ata a tamaiti, ae soso atu le faiaoga ma tu i luga ae o Tolasi, ma fesili, "Tolasi, o le lima o ai?" "Teacher, it's your hand!" ('Faiaoga, o lou lima!')

Ua manatua nei e le faiaoga, o lana masani e tago atu i le lima o se tamaitiiti o lana vasega, ma 'u'ulima, ma savavali. Ua na faia soo ia Tolasi, pe a tuua le a'oga. E tago ua 'u'u mai le lima o Tolasi, ma la savavali

faatasi, ma talanoa.

E ui lava o se mea na te faia i tamaiti uma o lana vasega e fetau iai, peitai, e peisea'i e taua tele atu i le manatu o Tolasi, lea ua ia tusia ai le ata o le lima o lona faigaoga e faaali ai lona loto faafetai i le mea na te faia soo ia ia, ma isi fo'i tamaiti. E le o se tupe, poo se mea'ai e taua, a o le lima ofoina atu ma 'u'ulima, ma talatalanoa fiafia.

---

## Give Yourself

**You give but little when you give of your possessions. It is when you give of yourself that you truly give.**  
**(Kahlil Gibran)**

---

# A'oa'o Malua Faauuina 2014

<b>Alaifetu ma Kalala Faaeteete</b>	<b>Aukilani</b>
<b>Amosa Silipa</b>	<b>Manukau</b>
<b>Clay ma Eseta Tofilau</b>	<b>Faleata</b>
<b>Epati ma Vichy Soula</b>	<b>Aukilani</b>
<b>Etiveni ma Siileviiga Taavao</b>	<b>Apia</b>
<b>Faaaliga ma Lafo Auvele</b>	<b>Amerika</b>
<b>Filemoni ma Alofa Crawley</b>	<b>Apia Sasae</b>
<b>Komisi ma Mercy Samuelu</b>	<b>Apia Sasae</b>
<b>Letupu ma Helen Matautia</b>	<b>Faleata</b>
<b>Mautofiga Tuuu</b>	<b>Falealili Sisifo</b>
<b>Mofate ma Aliitasi Fuimaono</b>	<b>Niusaelese</b>
<b>Mose ma Uputaua Malaga</b>	<b>Apia Sasae</b>
<b>Pasefika ma Talalelei Maiava</b>	<b>Niusaelese</b>
<b>Petelo ma Angie Pauga</b>	<b>Apia Sasae</b>
<b>Poasa ma Lemina Toiaivao</b>	<b>Faleata</b>
<b>Satala ma Rina Sa'u</b>	<b>Aana</b>
<b>Sean ma Faufau Palala</b>	<b>Manukau</b>
<b>Senetanari Autagavaia</b>	<b>Manukau</b>
<b>Silipa ma Tagiilima Silipa</b>	<b>Apia</b>
<b>Tasele ma Tine Tuluauau</b>	<b>Malua</b>
<b>Taulotoga ma Sago V iliamu</b>	<b>Ituotane</b>
<b>Ulale ma Usufono Sakaio</b>	<b>Falealili Sisifo</b>
<b>Falani Pauga</b>	<b>Malua</b>

## Trusting the Dog or the Man?

A man seeking a hotel room for himself and his dog received the following reply from an innkeeper in Kingston, Jamaica: "I've been in the hotel business for 40 years and never had to eject a disorderly dog. Never has a dog set fire to a bed. Never has he sneaked a girl into his room. Never has a dog stolen a towel or blanket or gotten drunk. Your dog is very welcome. If he will vouch for you, you can come along as well." - Parade

---

# O E UA MALILIU

## Louisa Tuitama

28 Oketopa 1926-29 Setema 2014

“Ua ou tau le taua lelei, ua iu ia te au le tausinioga, ua ou taofi le faatuatua.” I have fought the good fight, I have finished the race, I have kept the faith.” (2 Timoteo 4:7)

O Louisa Tuitama o le tiakono tina, o le tina matua foi poo le toe Iutaia o le Ekalesia i Moorebank, Pulega Sini i Saute, Matagaluega Niusaelese, Ausetalia.

O upu a Paulo ua tomua ai lona tala faalelotu, o upu ia na fai ma faavaa o le polokalame o lona sauniga faaleaiga atoa ma lona toe sauniga. O upu na filifilia lava e lona granddaughter o Louisa Toaivao. O upu ou te taofi ua talafeagai i lenei auauna ua a’e malo ona faiva alofilima e ala i lana tautua matavela i le Ekalesia.

Na taunuu mai Louisa Tuitama i Ausetalia ma galue i totonu o lenei aulotu, i po po fou o le asaina o le gasu o le taeao e ala i le fatu na toto i le aso 15 Aperila 1984. A o lea ua tupu le fatu, ua tupu tele ma ua ola mafala. Faafetai i le Atua. Viia lona agalelei. “Aua na totoina e Paulo, na faasusuina e Apolo, a o le Atua ua faatupuina.” (1 Korinito 3:6).

Na faatiakonoina Louisa ma le tama o le aiga o Apulu Fagupo Tuitama i le aso 14 Novema 1962 i le EFKS i Faleasiu, a o avea le Susuga Faavae ma lona faletua o Sifaga

Filemoni ma faifeau a le aulotu i Faleasiu. Na tuu le tina ma le fanau ina ua maliu le tama o le aiga, ma faaauau ai e Louisa lo la tofi tiakono e pei ona faapaiaina ai i laua ma le tama ia Apulu Fagupo Tuitama.

O molimau a le fanau i le afiafi o lona sauniga faaleaiga, na iloa ai e to’a ono le fanau a Apulu Fagupo ma Louisa Tuitama, e 38 grandchildren, 68 great grandchildren, ae 2 great great grandchildren. O lona uiga e to’a 114 tagata ua tutupu mai ia Apulu ma Louisa Tuitama.

O le tausaga e 1981 na malaga ane ai Louisa i Niu Sila ma nofo ai i nisi o le fanau, a o le tausaga e 1985 na malaga mai ai o ia i Ausetalia ma nofomau ai loa i nisi o le fanau i Ausetalia. O le aso 28 Novema 1987 na faamaonia ai i le tofiga a le Matagaluega, a o tasi le Matagaluega a Ausetalia e pei ona faamauina i le Api o le Galuega, le toe faaauaina o le tofi tiakono o le tina ia Louisa Tuitama. O lona uiga e maliu Louisa Tuitama i le 87 tausaga 11 masina le matua o lona soifua, ua silia ma le 50 tausaga talu ona auauna o ia i le Atua e ala i lona tofi tiakono. Amuia e oti o tumau i le Alii e pei ona fetalai Iesu, “O le tumau ia te au, ma au ia te ia, o ia lava e fua tele mai.” (Ioane 15:5).

O lo matou feagai ai ma lenei tina i le galuega, o se tina e faigofie ona talanoa ma fesootai iai. O se tina e fiafia e faasoa ma fautua i mea e manuia ai aiga aemaise le galuega a le Atua. O se tina e vaai mamao. Sa

toomaga ia te ia le faifeau ma le aulotu i taimi e satia ai le lotoifale o le Ekalesia i faafitauli. E ui i le faaletonu o ana mea faigaluega, ae setusetu mai lava ona o le fia auai i tapuaiga o le Aso Sa.

O se tina lototele. E musu e faailoa mai ia te oe ona uiga. O se tasi o a’u asiasiga ia te ia i le falema’i i Concord i taimi ua faasolo ina tigaina lona gasegase, na ou fesili ai ia te ia, pe iai se mea e mana’o ai. O lana tali e leai. Pau o lea ia momoli atu ona alofaaga i le Ekalesia, faatasi ma lona mana’o, ina ia galulue punoua’i, galulue fiafia ma fealofani.

O lona soifua galue ou te faamatalaina i le upu STEADY. Louisa worked at a steady pace. O lona uiga o Louisa o se auauna e galue nei, galue taeao, galue pe a faigofie, galue pe a faigata, galue pe a toatele, galue pe a to’a gaogao, galue pe a fiafia, galue pe a ita, galue punoua’i, galue mae’a, galue manu o ao aua e sau le po malolo. E faapena Louisa. Na amata galue i Samoa, galue i Niu Sila, galue i Ausetalia seia oo ina valaau lona Matai, a o galue pea o ia.

E matagofie ona sauniga na faia lava i le malumalu i Moorebank. O ona sauniga faaleaiga na faia i le itula e 5.30pm i le Aso Tofi, 2 Oketopa 2014. O au na taitai, o Litala Tuimauluga F. S. na lauga ma molimau i le la mafutaga ma Louisa a o avea ia ma faifeau o le aulotu. O lona son in law o Taiivao Milford A.F. na tatalo,

# O E UA MALILIU



**Louisa Tuitama**


a o Maiava Esau Viane A.F. nafaitauina le Tusi Paia. E matagofie ona molimau na saunia e lana fanau ma lona

aiga.

O lona toe sauniga na faia i le itula e 10am i le Aso Faraile, 3 Oketopa 2014. Na auai le Toeaina Faatonu o le Matagaluega, le Taitaifono o le Komiti a Tama o le Ekalesia, Susuga To'ese Peleti To'ailoa ma lona faletua o Senetenari, ona e le galo le mafutaga ma lenei tina a o tasi le Pulega tasi le Matagaluega. O le Toeaina o le Pulega Susuga Taeipo Malifa na taitai i lona Toe Sauniga. O Kolia Fiu Kolia FS na faaulufaleina lona sa, o Iakopo Leleimalefaga FS na lauga, o

Fiti Semaia FS na tatalo, a o Faatamalii Tanielu FS na faitauina le Tusi Paia. O le molimau mulimuli mai lona aiga na faia e Taiivao Milford A.F. O au na faia lona molimau faaleagaga ma feagai ma lona sauniga faaiu i Leppington Cemetery, o le pese faamavae a le Au Kerisiano na matou faamavae ai ia te ia: Talofa uso e, tofaina oe. Tofa Louisa! Manuia lau malaga.

Tue Lemalu FS,  
EFKS Moorebank,  
Sydney, AUSTRALIA



**Simatautu Tualetonu**

**6 Iulai 1955-23 Iuni 2014**

O Simatautu Tualetonu o le faletua o le A'oa'o Fesoasoani, o Taetafe Tualetonu. O ona matua o Tavita ma Punitia Faaiuso, o nisi o tama ma tina lauiloa o le Ekalesia, sa galulue i le alalafaga o Avao, Savaii i tausaga e tele. E to'a fitu ona tuagane, ae to'a tolu ona uso. E toatolu le la fanau, ae toalua fanau a fanau.

Na malaga Simatautu ma lona aiga mai Niu Sila, o galulue i le Ekalesia i Palmerston North, Matagaluega a Niu Sila i Saute. O

le tausaga lava lea 2011, na matou galulue ai loa ma faaaau ai lo la tofi A'oa'o Fesoasoani i le Ekalesia i Loganholme, Matagaluega a Kuiniselani.

O Simatautu o se auauna faamaoni i ona tofi, o le faletua o le A'oa'o Fesoasoani, sa auai ma faamaopoopo i vaega uma o le galuega. O ia foi o le faiaoga o le A'oga Aso Sa. O Simatautu na faamoemoe iai le faifeau ma lona toalua i le aoaoina o tamaiti, aemaise i taimi o le Lotu a Tamaiti, aua le tau faafilemuina o tamaiti, faapea lona fesoasoani i pesepesega e ala i si ana kitara ae taumafai atu le faifeau ma lana pi-ano.

Ina ua a'afia Simatautu i se gasegase tuga i lona ao, (brain tumor), na amata ai loa ona togafitiga, sa tele ina faataotolia ai i lona aiga ma le falemai. Ae sa taumafai mai lava i le lotu ma isi mea e fai a le aulotu pe a tau maua sona malosi. O se tina loto tele ma loto malosi, e fai Ekalesia ma alofa i le faifeau ma lona toalua.

Na valaauina ma le filemu Simatautu e lona Matai i le aso 23

o Iuni 2014.

O lona sauniga faaleaiga sa ou ta'ita'iina; o talosaga na saunia e le Susuga Isamaeli Lia'iina FS, o le A'oa'o Fesoasoani Susuga Leilua Gafa na faitauina le Tusi Paia. O lona toe sauniga sa taitai le Susuga i le Toeaina o Tauaaga Mataafa, o talosaga o le Susuga ia Pevise Leo FS, o le upu faamafanafana sa saunia e le Susuga ia Milo Faaleava FS. O le Susuga i le A'oa'o Fesoasoani ia Taetafe na faia le molimau i le la mafutaga ma le tina, faapea le fanau ma aiga. Na ou saunia lona molimau faaleagaga. Ona matou faatofa atu lea ia Simatautu i lona oliolisaga tumau, i le pese faatofa a le Au Kerisiano.

“Talofa Uso e tofaina oe,  
Ua sau le itupo e malolo,  
E ala oe pe a mavae le po,  
Tofa, tofa, tofa.

Parataiso Alesana Afaaso FS  
EFKS Loganholme  
Kuiniselani, AUSETALIA